

7. Bankar og verzlunarfyrirtæki, sem hafa skrásett símnafni, mega halda áfram að nota þau, en þó getur skeytaskoðunin hvenær sem er fyrirvaralaust bannað það 74
16. maí
- Þess er óskað, að viðskiptamenn símans, sem hafa skrásett símnafni, tilkynni skriflega skrifstofu skeytaskoðunarinnar í pósthúsbyggingunni í Reykjavík nöfn, heimilisfang og símnafni hinna erlendu viðskiptamanna, sem þeir eiga símaviðskipti við.
8. Skeytin skulu vera á mæltu máli: íslenzku, ensku, dönsku, norsku eða sænsku. Dulmálsskeyti eru ekki leyfð.
9. Ekki mega vera í skeytunum tölur, sem standa ekki í beinu sambandi við efni skeytisins og eru óskiljanlegar fyrir skeytaskoðunina. Tölusetning á skeytum er þó leyfð á ábyrgð sendanda, svo framarlega sem talan er fyrsta textaorðið.
10. Sé um að ræða ákveðna vöru, skal vöruheitið nefnt í skeytatextanum.
11. Bankar og verzlunarfyrirtæki, sem hafa að undanförunu notað lykilorð í upphafi símskeyta, verða að sækja um leyfi til skrifstofu skeytaskoðunarinnar til þess að fá að nota þau áfram. Skeytaskoðunin getur þó hvenær sem er fyrirvaralaust afturkallað þetta leyfi. Umsóknir um ný lykilorð ber að senda skrifstofu skeytaskoðunarinnar.
12. Enga bendingu má gefa í skeytunum um eftirfarandi:
- Hreyfingar, stöðu, tegund eða fyrirætlanir flota, land- eða lofthers.
 - Veður eða veðurskilyrði.
 - Skeyti um hleðslu vöru eða ferðir skipa verður að orða þannig, að aldrei fari saman nein tvö af þessum atriðum:
 - Nafn skips.
 - Farmur.
 - Nafn komu- og burtfararhafnar.

Óleyfilegt er að tilgreina ákveðinn dag, er skip leggur eða á að leggja af stað úr höfn, kemur eða á að koma í höfn, en hafa má ónákvæmara orðalag, svo sem „næstu viku“ eða „seint í næsta mánuði“ o. s. frv. Þó má ekki segja nánar um þetta en sem svarar vikutíma.

Póst- og símamálastjórnin, 16. maí 1941.

Guðmundur Hlíðdal.

Friðbjörn Aðalsteinsson.

REGLUGERÐ

fyrir Sjómanna- og gestaheimili Siglufjarðar.

75

19. maí

1. gr.

Sjómanna- og gestaheimili Siglufjarðar skal starfrækt og rekið af samtökum bindindismanna á Siglufirði undir forystu st. Framsókn nr. 187, og er hús það, er notað verður til starfseminnar, eign stúkunnar.

Til stofnunarinnar renna: Framlag ríkisins 30000 — þrjátíu þúsund — krónur, ásamt því framlagi, er st. Framsókn nr. 187 sér um ($\frac{2}{5}$ móti framlagi ríkisins), svo og styrkir, er síðar kunna að verða veittir til hennar, gjafir og annað fé, er henni kann að áskotnast til starfrækslunnar.

75

19. maí

2. gr.

Tilgangur stofnunarinnar er sá, að sjómenn og annað verkafólk, er á Siglufirði dvelur yfir síldveiðitímamann, geti átt þar athvarf í fristundum sínum, auðgað anda sinn með því að lesa bækur, hlusta á erindi o. fl., og notið þar aðstoðar og leiðbeininga, sem aðkomufólki eru nauðsynlegar.

Heimilið skal leggja áherzlu á reglusemi, og að starfrækslan öll sé í anda Góðtemplarareglunnar.

3. gr.

Aðalstjórn stofnunarinnar skal skipuð þrem mönnum, er st. Framsókn nr. 187 kýs á fundi í febrúar ár hvert. Skal stjórnin sjá um rekstur, viðhald og endurbætur hússins í samræmi við þarfir stofnunarinnar, hún skal enn fremur annast rekstur heimilisins yfir síldveiðitímamann, ráða til þess forstöðukonu eða forstöðumann og annað starfsfólk, eins og þörf krefur.

Þó skal heimilt, ef annar aðili síðar veitir rekstrarstyrk til stofnunarinnar, er nemi minnst 1500 — fimmtán hundruð — krónum að gefa þeim aðila kost á að leggja til einn mann í stjórn heimilisins yfir síldveiðitímamann, ef hann æskir þess, og skal þá einn af hinum kosnu stjórnarmönnum víkja sæti á meðan. Verði veittur styrkur frá fleirum en einum aðila með þessum skilyrðum, skal af stúkunnar hendi fjölgað um sömu tölu í stjórninni. Að loknu rekstrartímabili heimilisins ár hvert, tekur hin kjörna stjórn frá stúkunnar aftur við öllum rekstri eins og áður segir.

Stjórnin skal haga öllum rekstri og starfrækslu heimilisins samkvæmt þessari reglugerð, enda leggi st. Framsókn nr. 187 henni til það rekstrarfé, sem hana kann að vanta í viðbót við það fé, er hún sjálf safnar eða sér um söfnun á.

Stjórnin heldur reikning yfir rekstur hússins og sérstakan reikning fyrir rekstur Sjómanna- og gestaheimilisins. Skulu ársreikningar lagðir fyrir stúkuna í febrúar-mánuði ár hvert. Reikningar skulu endurskoðaðir af tveim mönnum, búsettum á Siglufirði, og skipar stórstúkan annan en st. Framsókn hinn.

4. gr.

Sjómanna- og gestaheimilið skal starfrækt 2—3 mánuði að sumrinu eða lengur, eftir því sem þörf krefur og efni og ástæður leyfa, en að öðru leyti hafa stúkur þær, sem starfandi eru í kaupstaðnum, húsið til eigin afnota og til þeirrar starfsemi, sem nauðsynleg er til fjársöfnunar fyrir Sjómanna- og gestaheimilið.

5. gr.

Sjómanna- og gestaheimilið skal vera opið dag hvern frá kl. 9 f. h. til kl. 11 e. h., yfir rekstrartímabilið. Þó er heimilt að lengja eða stytta þennan tíma eftir því, sem reynslan sýnir að bezt henti, enda sé húsið ekki notað til neins, sem kemur í bága við starfsemi heimilisins yfir rekstrartímabilið eða ætla má að valdi sérstökum skemmdum.

Á lesstofu heimilisins skulu liggja frammi til afnota öll þau dagblöð og önnur blöð og tímarit, innlend og útlend, sem hægt er að afla og fjárhagur stofnunarinnar leyfir, enn fremur pappír, rífföng og bækur.

Annast skal um að taka á móti bréfum og sendingum og koma þeim til skila, enn fremur peningum og öðrum verðmætum, sem geyma þarf eða senda burtu.

Útvarp skal notað, og sem oftast flutt uppbyggileg fræðslu- og skemmtierindi og til þeirra vandað svo sem kostur er á. Um efni alls þess, er þarna kann að verða flutt, sé stjórn heimilisins kunnugt, áður en það er flutt.

Umfram allt skal reynt að gera heimilið sem mest aðlaðandi fyrir gesti þess. Veitingasala skal fara fram, og sé selt smurt brauð, mjólk, kaffi, te, maltöl og gos-

drykkir. Sömuleiðis má selja skyr og einstakar máltíðir, ef skilyrði til þess eru fyrir hendi. Aðrar veitingar skulu ekki leyfðar. Allar veitingar skal selja við vægu verði.

Mönnum, sem eru undir áhrifum vins, skal alls ekki leyfð dvöl á heimilinu, en þó reynt að aðstoða þá og leiðbeina þeim eftir mætti.

6. gr.

Gefa skal fjármálaráðuneytinu árlega skýrslu um hag og rekstur Sjómann- og gestaheimilisins, og skulu fræðslumálastjóri og ráðunautur ríkisins í bindindismálum hafðir með í ráðum, ef einhverjar breytingar þarf að gera á tilhögun og rekstri heimilisins. Leita skal og samþykkis fjármálaráðuneytisins á öllum breytingum, er kunna að þykja nauðsynlegar á reglugerð þessari.

7. gr.

Nú leggst starfræksla Sjómann- og gestaheimilisins niður um lengri eða skemmri tíma, innan 10 ára frá byrjun reksturs þess, án þess að til þess liggji óviðráðanlegar orsakir, eða þá að um er að ræða endurtekna vanrækslu á rekstrinum eða brot á reglugerð þessari í verulegum atriðum, og skal þá framlag ríkisins eða sá hluti þess, sem eftir telst standa í húseign stofnunarinnar, miðaður hlutfallslega við fjárframlög stúkunnar Framsóknar nr. 187, endurkræft.

Hætti st. Framsókn nr. 187 störfum, skal framkvæmdanefnd Stórstúku Íslands ráðstafa stofnuninni og rekstri Sjómann- og gestaheimilisins samkvæmt reglugerð þessari, eða eftir þeim ástæðum, er þá kunna að vera fyrir hendi.

8. gr.

Reglugerð þessi staðfestist af fjármálaráðherra, ráðunaut ríkisins í áfengismálum og af stórtemplar (f. h. Góðtemplarareglunnar). Reglugerðin gengur þegar í gildi.

Reglugerð þessi samþykkist hér með.

Reykjavík, 19. maí 1942.

Jakob Möller.

Kristinn Stefánsson,
stórtemplar.

Friðrik Ásmundsson Brekkan,
ráðun. ríkisins í bindindismálum.

Staðfesting ríkisstjóra á skipulagsskrá fyrir „Minningarsjóð Margrethe Schiöth“, 76
útgefin á venjulegan hátt að mandatun af dóms- og kirkjumálaráðherra 20. maí 1942. 20. maí
Skipulagsskráin er þannig:

SKIPULAGSSKRÁ

fyrir Minningarsjóð Margrethe Schiöth.

1. gr.

Sjóðurinn heitir Minningarsjóður Margrethe Schiöth. Er hann stofnaður til eflingar garð- og trjárækt á Akureyri.

2. gr.

Stofnfé sjóðsins er 1000 — eitt þúsund krónur — en við það má bæta síðar, þó með því skilyrði að innstæðan í heild sinni, á hvaða tíma sem er, sé háð ákvæðum þessarar skipulagsskrár og má aldrei skerða hana.